



秋日海南漫興二首

一堂踈豁信超然

署內有超然堂宋建

瓊管風光盡眼前環

海螺蝦供酒具諸山樵採佐炊烟青霜不墮花迎
笑綠樹常陰鳥掛眠香稻垂垂秋再熟寒衣從未
見裝綿

不信珠厓多戰場旌旗兩見伏波強
還異竹箭籐牌技獨長在昔從無征粟米只今何
用貢瓊香自來聚斂非良吏常致君恩隔海洋

海南口占四首

南齊書集
粵有樛柳如建烟相沿風俗自何年非關瘴癘非
關冷一日閑消幾十錢
城外黎岐城內兵賊來城上自屯營駐防只有城
池重城外居民聽死生
葛布單衫箬笠冠繇來不解雪霜寒陰晴頃刻爭
冬夏節候惟憑曆日看
只愛魚鹽與木棉飛香沉水不論錢大家身外無
餘物一領紅籐自在眠

北發寄季貞弟

豈怨明時棄傷來淚滿巾兼程當輯瑞迂道為寧
親節序侵尋換山川記憶真此情先報汝早晚到
蹄輪

附季貞得家兄北發消息詩 忽見霜垂屋遙

哀萬里人去惟憂瘴癘到乃陷烟塵過海疑無
路還家剩有身一書來五月頭髮白高親

北歸渡海

萬里窮荒客經秋鬢已華入關今有路渡海即如
家北斗宵迎旆西風曉送車山川尋故轍歸矣莫

長嗟

英利橋

百里徐聞路間關幾暮朝亂流迴怪石叢箐隔危
橋樹影微穿日風聲遠送潮歸魂今已定安敢惜
途遙

雷陽中秋

海風吹雨滿城秋遷客憑膺起百憂沙濕夢中歸
路滑雲沉嶺外暮程收酒逢令節偏難下吟到深
更獨未休遙念老親應悵望不知今日在雷州

晚行

夕陽殘影沒孤騎亂山中樹末驚人語溪寒避虎
風柝鳴前路黑燒起遠天紅旅宿知何處飄飄獨
轉蓬

遂溪道中二首

羈棲猶未穩曉起涉清渠天外群峯出霜前幾樹
踈土荒人不聚戍列寇無餘王事還靡盬駸駸敢
駐車

問路雷陽盡荒殘景物非草深人影沒山轉轂聲

微雨霽秋如洗
天空鳥不飛
僕夫俱况瘁
何日解征衣

同張虞山步白藤山
不盡秋烟曉
攀藤緩步游
鳥驚山果落
溪冷石根流
染袖寒嵐濕
穿林古洞幽
寂寥人境裏
何必讓丹丘

化州山行三首

仄徑盤紆鳥舌通
萬山深處夕烟紅
籃輿竟日行
難盡只在秋林
曠藹中

山程遙望與雲齊
行上山巔雲復低
忽聽數聲鐘磬落
僧廬知隔幾重溪

白藤晨發暮黃桐
石路逶迤陵水東
榛莽烟沉雙眼闊
秋高何處覓歸鴻

歸鴻亭名

過那夏山

曉入羅州萬嶺長
晴烟迴互遠蒼蒼
深山古木人難辨
斷水危橋徑自荒
秀結桄榔迷雨黑
香浮秔稻接天黃
不知何處聞雞犬
百轉千盤路未央

復過熱水

秋嶠平臨萬綠齊驅車往復路仍迷槎柯榕樹叅
天出偃仰藤枝接水低側耳每聞山獠鬪驚心不
斷野猿啼老僧漫指泉流熱坐愛蒼涼到日西

端州九日與陳康侯張虞山飲古崧臺

巋然高閣峙江隈斜照清樽倚檻開人對黃花俱
老大客逢青眼暫徘徊峯頭雨勢連雲散樹裏濤
聲挾海來渺渺鄉心懸萬里西風蕭瑟此登臺

登七星巖同陳康侯張虞山二首

䟽鑿何年始陰森洞壑竒山僧枯樹坐溪叟淺舟

移鶴舞翻經石龍歸洗鉢池板蘿仍欲上絕頂一
筇支

諸公同載酒選勝集前亭澄鑑開斜照踈籬放晚
馨客留竒險跡山變曉昏形歸路重回首烟鐘出
杳冥

泊觀音巖聽張虞山彈琴

泯泯涇陽流群峯爭繚繞輕舟溯前江西日猶晶
晶既夕乃停楫炊烟依岸蓼四顧寂無人平林息
飛鳥夜半山水音悠然出塵表不復辨絲桐神情

逾浩渺推蓬一長吟江澄秋月小
過清溪
十月寒霜下沙痕淺愈清江空花石細岸斷戍烟
橫鷗鷺依維纜魚龍避濯纓倚檣迴望處紅樹一
溪晴

過曹溪水口不得登南華寺

何處南華寺風來流水香殘星低入澗孤月遠平
岡客舫殊容與禪關正渺茫數聲鐘磬落頓覺世
情忘

雨中過劍鋒灘

盡日盤渦路看山幾萬重雲迷峯不辨樹黑雨初
濃怒響知灘近奔流向石舂劍峯真可畏容與過
輕舸

英州謝楊汝隣贈石

主人自有元章癖今復移來書畫船歸載小園供
朝暮三山雲霧草堂前
悼鸚鵡
鷓鴣好南飛杜鵑絕北徙物情各有戀傷哉鸚鵡

死鸚鵡本粵鳥價與秦關比我來海南初愛其語
言美食之以玉粒繫之以銀繩籠以歸吾鄉中道
竟已矣最憐銜病時回首望海水積哀鳴甚悲重
困飛不起因嘆失路人能無懷桑梓渺爾一飛翎
抑鬱胡堪此

舟下十八灘

昨宵雨過水痕添夾岸晴光捲一簾灘淨綠苔凝
石齒雲歸紅樹出山尖長年指顧風波慣倦客飄
零歲月淹柔櫓緩隨殘日下幾家茅屋盪青帘

登望湖亭

亭左有睢陽廟

一上望湖亭上望亭孤自覺客心傷千秋俎豆空
祠宇萬頃波濤亂夕陽廬岳氣吞吳地盡巴丘流
接楚天長布帆無數隨雲去目斷汀洲雁幾行

望樅陽懷方爾止

十年破產未還家放浪江湖老歲華望入樅陽餘
秀色雲烟長繞石門斜

真州次壁上韻

客夢俱無著勞勞屢易船霜寒山影瘦風勁樹聲

南齋詩集
穿岸草移殘月星帆落曉天到家知不遠愁緒轉
紛然

冬歸二首

日暮歸里門、舉家相驚猜、謂余萬里人、一旦何從
來、老親急相持、扶杖下庭階、乍見反垂淚、久視顏
始開、妻孥亟入廚、煖湯洗塵埃、環立喜兒女、最小
撲我懷、遠歸良苦辛、骨肉幸無乖、有弟復有弟、為
我傾酒杯、

大有少陵北
征之意

親朋競我過、欵欵慰遠征、相顧問所歷、聽我請勿

驚艱危、越山海、叛亂遭甲兵、戍卒結洞蠻、戈鋌紛
縱橫、所仗有大義、開示出至誠、其時身入險、呼吸
判死生、何幸重會面、依依話柴荆、

河北別諸兄弟

匹馬輕裝去、大河酒酣拔劍聽、驪歌弟兄莫漫愁
行路萬里曾經瘴海過

曉行馬陵山

野店鷄聲夢裏聞、征衫顛倒夜初分、清霜滿地無
人跡、獨馬衝寒破嶺雲、

入城半城遇同年宋蓼天南還

客舍知何處殘陽落半城馳驅俱失路邂逅互關

情茅店支雙榻村醪對短檠無須追往事早發聽

鷄鳴

邸夜孫惟一翰讀金式菴舍人見過

放眼浮雲外高歌一愴然江湖悲萬里風雨夢三

年帝苑花仍發春城柳自眠往來諸舊好愛爾倍

纏綿

午日

世廟頒衣寵親裁自內宮

乙未館選三十人召至端門遣內侍量體為衣

明日各

賜一襲幾年珍疊雪此日憶呼嵩令節還儲艾

祝穆

進端午帖子有願諸醫國三年艾不博江心百鍊銅之句

孤身獨轉蓬新恩聞

賜扇殿閣遍熏風

出都

晨發桑乾路風微塵不生野塘明積水高柳映孤

城草淺牛閒卧烟深鳥細鳴田夫知雨足荷篠看

新稅

上谷旅夜見月

西塞上新月，天空映酒清。
頓忘昨夜雨，別有故鄉情。
歷歷星河影，沉沉鼓角聲。
僕夫各安睡，端坐憶平生。

宿新樂公署感懷次壁上韻

倦客栖栖道路偏，自搔短髮任風煙。
入城市暗單車外，迎館燈青細雨前。
鄉信久從滹水斷，旅情還向薊門懸。
誰留壁上詩堪和，啼盡鄰雞尚未眠。

聞蟬

不覺沙河柳，新蟬感夏生。
枝高先得所，時至自聞

聲。漫鼓迎風翼，還深飲露情。
悠悠觀物理，吾欲謝浮名。

夏日晉州作

為避長途熱，來休鼓子城。
看花忘晝永，坐雨見池清。
架上青編亂，床頭綠綺橫。
不須河朔飲，高卧有餘情。

晉州別崔子高

回首車塵化客衣，燕山明月久相違。
治安有疏長沙遠，服食無緣勾漏非。
空老江湖愁寇盜，自憐風

雨夢庭闈深情對汝消難盡酒滿清尊悵落暉
棗強道中
土燥難耕耨家家種果園綠雲連蔭密寒玉綴枝
繁解渴揚鞭得嘗新任手援野人猶苦歲終讓穀
為尊

古意

晨起臨寶鏡開簾畫蛾眉春花風送入春日已遲
遲

棄婦歎

南山有崩時黃河有枯日所遇忽若斯能不惕以
休結髮為夫婦生則願同室一旦遭棄捐舊恩違
重恤不怨君恩移自疑妾行失妾心當誰明水落
石自出珍重新人歡得意使永畢

宿淨土菴

惆悵城西寺何為駐遠征月殘僧梵靜風定佛燈
明尚作還家夢逾增倦客情竹樓眠未穩枕上已
鐘聲

淒淒冬日五首

時將去海南弟季貞客越未歸數易期待之不至作

淒淒冬日駕言遠之顧瞻周道憂心如遺我歸自
北庭露方滋載瞻載依爰遂我私云胡不樂于彼
海涯

淒淒冬日城烏晚呼雛飛不還誰返其哺念我堂
前五子同乳惟汝與我以慰朝暮汝適不來使我
心瘡

淒淒冬日逝莫能維憶汝南行秋以為期場禾既
登檐梅孔時拊我征車亦既再脂胡不遑歸與我
怡怡

淒淒冬日曠言萬里嶺高海深云誰我以踽踽獨
行寒吹北起道路皆冰歲聿暮矣彼何人斯迫我
斯徒

淒淒冬日天地閉藏遠我父母其誰我將懷哉懷
哉胤憂以痒我馬蕭蕭我僕皇皇出爾載返莫敢
或違

平河橋答別諸親友次程婁東韻二首

一雁衝雲直北來隨陽何日復飛迴却憐親舊頻
相送折盡垂楊又折梅

南齊詩集
方船載酒慰離情人散黃昏月乍生一望寒河煙
水白峭帆風起任南征

召伯埭逢張虞山舍弟季貞

十月辭家萬里行風吹寒葉下蕪城每疑江上觀
潮晚共愛橋邊看月明咫尺未歸還旅夢雲烟如
畫摠離情飛鴻何事愁過嶺也怯春回瘴癘生

紅橋招同鄭掌和龔半干孫豹人陳伯璣朱

秋厓黃甫及張虞山舍弟季貞泛舟
載酒城陰鼓畫橈蒼烟殘日泛紅橋茱萸灣接雲

山近楊柳樓迷歌吹銷甲騎當年屯帟豹玉鈞何
處葬妖嬈寒梅欲慰愁人眼爛熳南枝放此宵

邗江留別張虞山舍弟季貞

霜滿蒲帆曉欲開故人登岸重徘徊半籬野色留
殘菊一笛江風起落梅池草夢迴虛襍被旗亭歌
冷斷銜杯紅橋昨夕憐同泛不盡烟波獨溯洄

雨中望燕子磯有懷王阮亭

細雨溟溟入望中孤舟兀坐正開篷磯迎燕子青
千仞潮打蘆花白幾叢吳楚江湖秋水闊齊梁陵

墓晚烟空使君到處題名在惆悵登山屐未通

泊魯港

以魯仲明名

風轉江斜葉亂飛纖纖初月淨寒輝荒蘆夜靜鷗
眠穩殘角霜清雁過稀處士潔身依斷港遷人搔
首望危磯山川自覺多佳勝不許浮塵上短衣

蘇州阻風口號

兩日磨盤洲三日鷄冠嘴雲樹隔相望人烟無一
里

江行晏起

送迎人事絕一艇足高眠帆轉白雲入窗踈紅日
穿中流魚狎浪極浦鳥衝烟起坐渾閒適江光遠
岫連

泊張家渡

屬吉安

野泊張家渡人烟剩幾家村鉦時畏虎戍火夜驚
鴉風起舟難穩潮迴纜更加聊憑一樽酒漂泊信
天涯

聞吳羽三罷澄邁北歸途中未值

旅竄同奇甸今君已北歸嶺雲不相待江月幾還

南齋詩集
依白髮家園近丹心廊廟非豐城知有劍寧久閉
光輝

過別灘

隴水分流異今宵過別灘望鄉雲更杳逼歲臘逾
寒幽谷鳥聲變疎林月影殘渭城歌久歇又作送
行看

虔州與楊天柱大令

章水淮山意萬重去來無定又相逢可憐今夜仍
岐路絲竹喧闐到曉鍾

南安與趙五絃郡丞

舊雨春明夢幾秋相逢天外倍綢繆途窮已任呼
牛馬巢冷何須辨鵲鳩雁影不曾過庾嶺猿啼更
欲度虔州持觴苦慰南遷客細管清絲夜未收

南雄立春

短景迫長征荒郵坐二更臘隨鄉信杳春向客愁
生嶺曙占雲氣灘高雜雨聲家庭都擬我安穩五
羊城

平圃守歲二首

未暮投江驛堪憐一歲徂村墟散小市粗糲點行
厨風俗他鄉異周旋此日無翻難成穩卧盡夜酒
為徒

古稀年且半迴憶轉悽其上闕猶瞻望前途正透
遲歲華傷易晚骨肉聚何時柏葉傾今夕能無作
客悲

滇陽峽

無盡峽中峽還看山上山氣蒸雷雨奮春動鷺鷥
閑地瘠居仍密江清石似頑腫隴見初月遙挂碧

煙灣

寒食訪梁芝五程周量王震公諸子不遇
細雨初晴寒食天春原芳草綠芊芊不知何處群
修禊閑殺梨花滿樹烟

嶺南絕句

歲時耆舊總相歡風土天涯亦漸安手把蒲葵明
月下梅花開遍不知寒

雨中過高峽山

不辨鈴山寺蒼茫一望迷瘴高侵雨暗雲重接天

低清磬林邊落孤猿嶺上啼客愁何處寄吾道本
栖栖

看高峽山出雲

英英纔見起忽已失前峯我亦無心者悠然出岫
逢

與徐健庵孝廉

猶憶登臨在帝鄉重逢各已鬢毛蒼蕉花絲染蠻
人俗萋葉灰寒客子裝半榻踈陰過翡翠一簾明
月照桄榔共君此際懷無盡莫負飄零對舉觴

春日自粵東赴京改補登舟有作

今日開帆去五羊扁舟仍自泛輕裝微雲欲雨添
山翠細草隨風送水香望入嶺梅歸思豁聽殘粵
鳥客愁忘君恩如海深何極特免孤臣瘴癘鄉

答安靖九

萬里東歸日逢君一唱酬珠還留故浦石自穩扁
舟玉笋春江發紅蕉嶺路稠相將看水戲蘭渚浴
輕鷗

春暮江行

春歸客亦返隨地轉留連日暖花迎岸江空鳥趁
舡懸蘿幽近水陰洞濕浮烟未識南華逕鐘聲何
處傳

嶺上訪澹歸

梅關入望亂峯青木末孤懸一草亭雨過苔堦雙
印屐雲深竹屋獨翻經乾坤老去無歸路猿鶴看
來總化形今日相依禪榻坐袈裟濕盡淚飄零

市汊雨泊

風細江聲迴天低水氣含村遙團雨黑樹晚重山

藍簑笠來漁艇蛟龍舞劍鐔客帆移未得歸夢到
淮南

登滕王閣

時郭堯功招集安靖九宋子章分賦

臨流百尺起朱甍檻外荆吳放眼明自是山川開
勝地長留歌舞近高城帆孤遠落波濤影閣迴常
來風雨聲最喜文人同載酒子安詞賦復誰爭

望湖亭野步

極目危亭返照紅山光遙沒水雲中沙間草長過
新雨天際舟歸信晚風匡岳仙人何處問柴桑高

士此時空頻年道路疲奔走恰與江春候雁同

自君之出矣不復理羅纈思君如蛛網終日自盤

結 風雨繁最喜丈人同 歸西千安同 湖東 歸年

自君之出矣不復下堦行思君如庭草鋤去還復

生 亦百尺 豈木 貴 歸 水 歸 吳 歸 湖 歸 山 歸 湖

倪天章招同陳子九王任公舍弟季貞父飲

一草亭有憶 斬茶坡

月正中天霜氣明空堦木葉亂秋聲樽開野菊迎

殘圃雁帶孤礎落遠城長路馬牛初倦跡故人雞

黍有餘情最憐題壁留佳句使我燈前涕淚生

程周量舍人舟過吾郡適兵至不泊以詩見

遺兼期北赴率爾答之二首

三月辭炎海蓬扉許見過纔為經下里忽已渡長

河久待歡投轄遄征避荷戈不因書却寄南望奈

愁何 離 萬 里 離 亦 難 春 豈 且 喜 必 氣 何 歸 湖 歸 湖

反覆吟佳句知君相念深山川千里夢兵甲一時

心露待凝仙掌花看滿上林我慚檣散質祗合鈞

南齋詩集

三

南齋詩集
士此時空頻年道路疲奔走恰與江春候雁同

自君之出矣二首

自君之出矣不復理羅纈思君如蛛網終日自盤
結

自君之出矣不復下堦行思君如庭草鋤去還復
生

倪天章招同陳子九王任公舍弟季貞夕飲

一草亭有憶靳茶坡

月正中天霜氣明空堦木葉亂秋聲樽開野菊迎

殘圃雁帶孤礎落遠城長路馬牛初倦跡故人雞
黍有餘情最憐題壁留佳句使我燈前涕淚生

程周量舍人舟過吾郡適兵至不泊以詩見

遺兼期北赴率爾答之二首

三月辭炎海蓬扉許見過纔為經下里忽已渡長
河久待歡投轄遙征避荷戈不因書却寄南望奈
愁何

反覆吟佳句知君相念深山川千里夢兵甲一時
心露待凝仙掌花看滿上林我慚樗散質祇合釣

淮陰
一身歸萬里節序轉春溫且喜依庭訓猶慚負國
恩馬趨元會冷雀噪曙光暄漸覺逢迎倦從今學
杜門

過龍興寺訪白孟新承示新詩

祇園雨過晚停車滿院風閑白薺花客思蒼涼知
又甚却傳珠玉遍天涯

喬石林招寓陶園適汪季角見訪留同小飲

清和節近綠陰齊步屨閒來花滿蹊蝶翅翻殘紅
藥亂鶯聲啼老碧楊低風流何必懷江左歌吹于
今邁竹西共愛主人情爛熳不須明日更招攜

江艇

長夏移江艇蒼茫旅興寬片雲輕一葉孤鳥下迴
灘蒲綠迎潮闊山青帶雨寒推篷望前岸禾穗愛
團團

江上吊黃靖國墓

將軍華表望嶺屹高拜雲霄萬古魂松柏滿山陵

谷換風烟如夢地，天昏豺豸跋扈牽。南禦笳鼓翽
翽送北吞，不負生平酬一劍。夜潮長打石城門。

候館

候館臨寒渚，儵然花木幽。風垂蘿捲幔，雨過竹低
樓。野色天俱淨，江聲夜未收。沙邊閒倚杖，何處不
滄洲。

估客詞

揚子津頭白浪推，潯陽賈舶晚爭移。等閒用盡千
夫力，不及東風一夜吹。

孫惟一翰讀過訪留飲
南荒歸後卧松筠，自覺吾廬迥絕塵。同學輕肥誰
復賤，腐儒粗糲肯辭貧。鵝鸞以合趨青瑣，鷗鷺無
容望紫宸。他日待君開綠野，還邀明月醉湖濱。

過寧國龔扶萬太守招飲壘嶂樓

百尺樓高靜不譁，振衣更上一丹霞。江頭烟淨青
千嶂，樹裏陰濃綠萬家。畫棟風疎喧鳥雀，平田雨
足長桑麻。美人為政心偏逸，觴咏頻留到日斜。

趙天醉招飲許氏山亭復泛汶溪同謝二峯

夫子王石農金于民暨令姪又呂諸子四
選勝登危閣憑虛俯翠巒孤城雲外起萬井樹中
看江闊低飛鳥泉高下急灘幽懷常不厭莫放酒
盃乾

卜築誰能爾幽林自閉關風飄隣寺磬霞起隔城
山路轉松篁密心隨猿鶴閒海陽諸勝境喜得此
同攀

溪添新雨後畫舫更冲融酒映前山碧花依曲岸

紅乍疑高館失轉愛晚烟空不盡為歡意厭厭夜
欲終

一瀉清湍下洗洋萬壑通沙明秋岸月燈亂石橋
風酒罰從人酷詩吟入夜工看君浮槩去遠影沒
空濛

雨行泰安道中

驅馬高城下溟濛夕雨微雲沉迷嶽望風緊亂禽
飛樹裏鐘聲濕溪邊人影稀艱難無可慰何處一
枝依

追哭靳茶坡

世路今難問，凋零况老成。
黃農敦古處，張范信交情。
風義推先輩，文章失正聲。
遺書余有托，安忍負平生。

同孫忤庭伊翁菴綦松友曹澹餘諸同年集

胡又弓署中

我來燕市無多日，幾向高樓駐客輪。
座接黃花看未晚，杯浮綠酒勸何頻。
十年懷抱如沉醉，萬里風埃似舊親。
今夕復依鷓鴣侶，端明猶作夢中春。

過綦松友陶月亭奉和原韻

風流聞謝傳，絲竹寄東山。
綠樹紅亭外，清泉白石間。
漁歌烟渺渺，秋水夜潺潺。
明月斜堤起，依君醉未還。

同從弟慎菴南歸

汗漫天涯心事違，不如鄉國早同歸。
雲高薄暮終浮靄，日短孤征易落暉。
通潞亭邊人北去，望京樓外雁南飛。
倚門白髮知遙待，珍重光陰理綵衣。

楊村新月

落帆向西望初月隱林端星爛分光遠霜鋪映影
寒登樓愁欲暗隔水照如殘直待清輝滿中天好
共看

答別胡天仿程婁東閭再彭百詩諸子

南北風塵望頻勞送遠行頽頽慚故舊倦羽失平
生水暖花連岸烟深柳帶城最憐春蕩漾罷酒獨
長征

郊城吊古

傾蓋亭前碑尚在問官城外草橫空只今古道入

誰覓足馬蕭蕭向晚風

沂州境有二疏散金臺

細雨沂州路春陰二月天草枯新換綠樹老淡含
烟滑磴人難下危橋馬不前因懷疏太傅金散早

歸田

途中酬孫惟一翰讀時自瓊州復入都

去留回憶十年情花滿春郊遠送行明主何期憐
放逐微官無力効澄清文章幾恨虛名早鬢髮徒
令壯志驚此日隨君還赴闕相看殊覺負平生

今此花朝次河間遣懷
 望裏長安近天和風日清曉鶯隨樹轉春水漲沙
 平路入瀛州勝花連上苑明拂衣還對酒真覺此
 身輕

酬綦松友學士見贈二絕句

珠厓已斷夢中春又傍長沙作遠臣自信風波無
 可畏故人還為惜江濱
 誰辭老大捕麋難曾識江濤遜海瀾今日拜恩雙
 闕下錦袍長憶賜春寒

都市口占五首

報國松前廟市張退朝官府雜工商誰開祖帳毘
 盧閣滿院笙歌沸海棠
毘盧閣左有海棠院
 天寶樓開製造新瓊琅時過到烏銀鮮衣怒馬來
 如織賺盡長安富貴人

梁家園北好盤餐沿岸垂楊遮畫欄公子王孫擁
 歌妓夜深猶未罷吹彈

天壇門禁無塵惹日射琉璃五色瓦壇中道士不
 黃冠東開酒肆西茶社

金魚池繞柳如烟隨地擅鋪人醉眠忽聽嚶嚶神
會過往觀攘攘競摩肩

無題

雲散風流忽五年西河遙望最堪憐分明舊日聞
歌處只有垂楊帶晚蟬

三家店

梨花春酒名

野宿三家店投鞍土竈旁蠨蛸斜挂戶榆柳曲成
梁雨帳寒難穩風簷夜怯長梨花誰命酒強起不
堪嘗

景州道中小憩

就食高榆下繩床午倦生夢醒炊爨熟風過芰荷
清矮屋雞頻上荒田馬代耕老農無一事草坐話
陰晴

山行二首

山程風露曉淒淒迴復荒岡路欲迷樹裏行人看
不見隔林時聽馬聲嘶
仄磴高低幾百迴棗林深翳石崔嵬哀湍暗瀉殘
星下亂屋斜穿曉日開

馬上晚望

羣山荒瘠不知名度水穿雲幾日程天闊更無高
鳥過樹深惟有暮蟬鳴

月霽曉行

夜雨聽初歇披衣月滿簷山明空翠豁溪響亂流
添迎馬曙光動穿林餘濕露兼程鄉思急不止避
蒸炎

宿青駝寺

每過青駝寺饑驅晚就炊家家蜂釀蜜樹樹繭抽

絲杼軸鄰燈借盤飧野藪為土風真朴畧猶見魯
鄒遺

七夕後二日過愛園贈汪叔定季角

秋氣散林塘踈襟愛辟疆青莎分石逕翠篠隱花
廊好客浮三雅能文過七襄不徒雙綵袖丘壑奉
高堂

愛園樓上與王西樵汪叔定季角夜話時西

樵先別悵然作

晚涼不惜醉更上最高樓樹隱星光動花明露氣

稠幽談清萬籟散坐爽初秋獨悵山公去誰同乘
燭遊

初冬江行

十月江南暖潮平好放舟蒼葭霜岸老紅柏晚山
稠近港懸漁罟收帆倚戍樓風烟猶故土隨意足
淹留

再登廻瀾閣見徐健菴和舍弟季貞題壁詩

率爾再和之

倚棹荒磯下蒼茫識舊過山空寒葉滿樓矗野雲

多古駟霜飛雁廻灘月浴罷開樽對塵壁最愛讀

吳歌

附徐健菴登廻瀾閣見丘季貞題詩率和 丘

遲入荆楚錦纜舊曾過黃絹辭真妙青衫淚已

多佛燈寒竄鼠戍鼓夜鳴鼉我亦飄零者還來

倚檻歌 江流對皖口短棹此經過酒覓荒村

少詩題古駟多高樓巢燕雀落日走鼉鼉匹練

愁還遠當窗發浩歌

皖城却寄陳碧涵

時廣文池州

南齋詩集
吳山歷盡楚天長
渺渺孤帆挂曉霜
首藉齋中休
北望已隨南雁度瀟湘

春日署中與吳嵩三李房六宋子章閒坐
還傍天涯作逐臣
感君千里遠相親
梅花欲落三
江雨芳草初晴二月春
酒興不隨黃鶴去
詩名常與白雲新
祇今共望西門柳
萬縷依依綠向人

臨洞庭懷金式菴常德胡虞野衡陽

十年舊夢憶皇州
風雨湖南又幾秋
回雁峯前書不到
問津源上水空流
衝烟欲渡瀟湘浦
待月還

憐鷓鴣洲獨傍漁翁垂釣處
白雲遙望起人愁

遣懷

湖上清光四月初
波澄日煖欲何如
開樽醉殺巴陵酒
出網烹來石首魚

九日送秦惕菴夫子歸毘陵

細雨重陽送客歸
登樓縱目正霏微
檣烏影沒江
烟渺沙雁聲沉
鄉信稀
沿路恐經楓葉換
到家猶及菊花肥
獨愁秋水浮天闊
小艇風寒未授衣

武昌北放舟

時奉檄督運北上

忽漫江城卧幾年、此行自擬是登仙、簿書暫謝開、
緗帙山水時招入、畫舫最喜過門留、定省還能赴、
闕、問班聯榜人、急報張帆去、不負鶯花二月天、

花朝酬宋牧仲通守招陪陳謙六陶漢為呂

季成諸使君

信宿維江岸、清樽日往還、徵歌在湓浦、憑眺向匡、
山花早迎風、暖鷗輕隔水、閒辰良兼地、勝盡夕放、
歡顏

雨阻磨盤洲宋牧仲餉以藕粉瓜絲謝之

春雨江烟重、因依駐畫橈、燕飛何就下、鶯阻未遷、
喬忽贈銀晶粉、兼貽碧玉苗、掩篷清供足、早已忘、
漂搖

於煙水亭別呂季成八日矣復遇老鶴口同

過宋牧仲舟各出新詩相示即用季成韻

一從烟水亭前別、日日清江憶勝遊、沙渚何緣成、
各繫風帆無計得、同收忽逢舊侶開、歡笑互出新、
裁起唱酬今夜不、須仍散去滿將大白盡情浮、

宋牧仲招同呂季成登岸小飲

野泊收帆早，灘沙漾水圓。
射分前岸闊，帘愛晚村懸。
巨口穿鈎活，新芽迸砌鮮。
乘教幽興盡，濫醉不迴舡。

同宋呂諸使君遊宋氏山林憩積真寺後圃
是日牧仲招集識舟亭五首

舊識三山路，平林秀色齊。
露桃紅岸岸，風柳綠溪溪。
地豈武陵異，人應谷口迷。
春遊曾不厭，尊罍任招攜。

不獨烟霞勝，還增位置嘉。
編籬門映水，種竹路穿

沙軒牖山相向，亭臺樹半遮。
未知葱蒨裏，絲管又誰家。

曲折臨峯頂，巉巖起石坳。
四圍青不斷，一逕綠全交。
葉底黃鸝出，梁間白燕巢。
逍遙依後圃，新笋愛僧庖。

望眼曾無倦，高低足力降。
樓多幽背郭，山迴秀緣江。
禪榻臨花塢，清溪漱石缸。
莓苔頻欲憩，林鳥起雙雙。

渺渺舟難識，空亭勝槩收。
故人良晏會，詞客最風

南齋詩集
流烟白江如定雲蒸山欲浮
疎鐘沉夕照猶共戀
磯頭

江臯曲
三台閣下謫仙樓連袂攜壺共冶遊
黃菜花邊穿
蛟蝶碧桃影裏度篴簫

題丁繼之秦淮水閣用錢牧齋壁上韻
南朝幾換物華新淮水于今尚屬秦
燕子巢懸歸社日桃花風送隔江春
晴溪有笛傳空步夜舫無燈照舊津
猶賴老翁好層閣長教烟月戀閒人

泊燕子磯月下過弘濟寺訪蒲菴上人和舍弟季貞壁上韻

信步尋精舍疎林入夜幽
天空懸峭壁岸迴俯層樓
遠樹春星滅深龕佛火浮
高吟愛吾弟禪榻昔曾留

已酉三月再泛紅橋同宋牧仲汪季角喬石林韓醉白兼懷王阮亭諸君三首

路識曾遊處春風別一天
舸輕新雨漲城迴暮雲連
犬隔桃溪吠鷗依柳岸眠
衰衷偕舊侶佳興故

悠然

畫欄烟樹下、春影亂紅橋、嬌鳥驚人散、名花隔水、
招迎風頻縱酒、落日屢停橈、悵望平山外、迷樓夢
未消、

勝跡留當日、今朝思黯然、筇筵觴夜月、芍藥舞晴
烟、白雪存詩格、黃鶯喚酒船、法曹真好事、長使竹
西傳、

同舍弟季貞招張虞山喬石林陪周櫟園宋
牧仲夜飲

春江一路傍、征旛老後聲、名我識初滿、載画圖千
里外、共留粗糲五更餘、人從隔代推風雅、夢向當
年問簡書、湖海相逢方恨晚、自今酬唱未應踈、

普應庵拜先大兄霖川柩 舊曆湖西
因水遷此

未了生前痛、遺棺復坎珂、頻移心坼裂、再拜淚滂
沱、孤刹香燈少、荒棚鼠雀多有兒、今可嗣卜兆、敢
蹉跎、 將以過兒
為大兄嗣

泊滄州

忽漫奔濤起、石尤孤桅震盪泊滄洲、雨沉前路人

難渡沙捲長河客自愁雲霽亂峯黃落照烟迷深
柳綠平疇披襟散步空堤上北地蒼涼五月秋

題馬西樵聽山堂

野色遙無際蒼然列數楹門偏迎夕照樹雜亂秋
聲虛室常生白寒流自覺清主人閑閉戶抱膝有
餘情

中元坐雨遲葉蕃仙不至夜霽月明悵然有

懷

兀坐孤相憶何當秋雨時待君終不至更向月明

期揮手輕干乘棲身託一枝委蛇親老日升斗未
應辭

秋日招華陰王山史會稽葉蕃仙溧陽彭爰
琴再宓同郡李條侯吳姬望嵩三集天壇
李道士亭子

勝地長安何處尋天壇一望氣蕭森高槐烟鬱層
霄上老柏風盤古殿陰屐齒到堦無俗駕蟬聲入
座有清音停雲藹藹閑如此共寄秋空野鶴心

酬別陳學山學士

乍聽尊前折柳吟依依何限故人心從來不下青
衫淚此際難酬白雪音三殿從容煩啟沃五湖安
穩信浮沉秋風明日辭丹陛莫向清鐘晚寺尋

秋日報國寺送王山史歸華陰

旅雁初來秋正分故人西去悵離群頻持斗酒還
相勸一曲驪歌詎忍聞鷓首猶遲南紀月時予將還楚任
馬蹄先起太行雲敢忘細草殷勤意玉案時時把

念君

將出都阮鶴緱夜至話別

盡束奚囊待著鞭良朋卒至轉凄然風高屋大嫌
人冷酒濁燈昏夜不眠帝闕幾時容我戀鄉書此
日賴君傳萍踪倏又分南北愁聽鐘聲落座前

出都

屢易登程日猶遲去國心殘鞭催夕照歸路感秋
砧鳥倦投林急雲飛護闕深行藏俱未定客鬢雪
霜侵

里二溪野步

水急沙灘遠蒼涼何處村荒樓爭鼠雀壞道冷蹄

南齊詩集
三
轅白雪蓋花亂黃雲豆葉翻吾心愛農圃散步上
秋原

聞雁

風急張帆直向東數聲寒雁落秋空驚心為帶關
山恨行路長悲霜雪窮書斷雲中猶有望群離天
外杳無通淒其二十餘年淚濕盡征衣任轉蓬

舟下分水

水勢南分雨後寬從今行路不愁難船頭穩坐迎
斜照櫓尾輕搖入晚寒響動漁罾依遠岸光生戍

火映迴湍榜人忽唱涼州曲把似吳歛夢裏看

南歸至河口

黃河東下是清江風靜濤聲夜不降猶憶春時從
此去旅魂今夜定篷窗

與舍弟季貞別後旋以詩至適阻風雪即還

省母

一出城西路難將藥椀親以慚溫清失徒乞往來
頻離別餘孤夢歸依祗浹旬趁茲風雪夜身及寢
門真

附季貞詩 勉出西門送終難半里親黃昏歸
且急白髮夢應頻迎養難千里回瞻俱六旬此
行相送淚不獨棣華真

濬淺舟阻二舖再還省 母

莫謂天涯苦艱難自里門流淤遷岸谷源遠竭崑
崙荷鍾如雲集驅車入夜喧淹留翻獨喜猶得侍
晨昏

舟阻平橋再還省 母

幾日開官舫遲廻只半程却因歸省易倍憾遠遊

輕霜草長堤白河水淺窳明衝寒三十里樹樹哺
鴉鳴

晚泊秦郵劉雪舫王維弘見過

挂席風頭北停舫日脚西近城喧夕鼓隔水聽寒
雞對客顏初慰思親首重低感君相問訊進退總
栖栖

瓜洲望月全友人賦

滿舫新月傍江城隔岸烟嵐半滅明沙淨有時來
雁影潮廻入夜帶鐘聲星河淡淡群峰隱風露微

微衆籟清把酒對君全不寐百年人事漫傷情
懷張虞山
年年別袂輕千里夜夜詩情到五更只恐他時酬
唱少江干誰和斷鴻聲

輓蕭尺木

冷淚風前落驚聞謝老成如何別半歲遽爾失長
庚筆墨光難掩山川氣自生猶思分袂日玉樹倚
軒楹

重登識舟亭

振衣特立翠微中不辨蒼茫四望空塞雁紛紛遙
自北江潮滾滾直歸東烟開澹月銜山白星帶繁
燈漾水紅今日孤舟重此繫高亭觴咏與誰同

江上望九華

奇峯空外結靈霞鬱鬱何能辨九華常憶飽餐白
玉髓直須俯視青蓮花洞天應有神仙窟使客徒
乘牛斗槎盡日江風吹不斷一帆廻折晚烟遮

八里江除夜與友人

八里江邊夜欲除滿天急雪擁寒爐更深強使呼

南齋詩集
臬雉春到先愁聽鷓鴣盤裏椒花風味渺樽前柏
葉歲華徂極知飄泊身能慣藥椀慈親罷盡無

人日江行

人日清江雪乍晴東風吹暖送舟行有時白鳥投
前浦無數青山抱遠城

午日張翰存吏部飲餞東溪

高閣今初上憑欄認舊溪水嬉過鼓急雲涌奪標
齊蕭艾人誰辨江湖路久迷翻愁明日去一醉夕
陽低

艤舟湖心寺哭亡兒達

是日兒忌辰

棹倚湖干忍遽移殘沙落照草離離傷心最是臨
歧日痛哭還如永訣時幾有登程曾不送縱能入
夢亦難期寂寥鐘磬城西路歸更何年酹酒卮

湖心寺再別舍弟季貞

水繞西樓帶綠楊還依芳草坐行觴竒雲驟黑三
時雨化日曾陰五月霜信宿禪扉心漸冷低徊客
路夢猶長祗今戀戀惟兄弟絮語篙師又駐航

南陽觀荷

舟至南陽沿湖紅蕖數十里清香襲人余曾看鄧尉梅花豐臺芍藥

花田素馨皆希觀也此又增一勝矣

千里孤征夢未遑披襟此日過南陽明湖四映鋪
紅錦畫楫雙浮颺碧香大火欲流朝露濕緒風漸
動晚波涼不知行盡花多少猶覺芬葩
傅立芙蓉歌從風芬葩
引望長

濟寧舟中苦熱

赤日天中一棹孤炎蒸無計避長途岸高篷偃風
難入山遠泉遲雨又枯幾見官亭愁過聞乍看漁
艇喜通湖濟源但借三分水直上津門達上都

途次聞伊翁菴銀臺還歷下悵然奉懷

塞漠來冥鴻海澨歸紫燕春秋各有期中道時相
見汗漫嗟我遊咫尺河流眩停撓遲旦夕旌旆揚
東傳轉輸昔留京兄弟同歡晏契闊五歲餘寒暑
隔鄉縣泊如滄溟中島嶼空馳戀先民敦古處百
慮消一面顧今掉臂失心神徒盼盼

東昌來青禪院納涼

客舫喧候聞就蔭過禪房綠上層樓爽青延大野
涼池幽蓮葉暗門靜豆花香半日羲皇卧逍遙愛

石牀

初秋高陽李相國招集心遠堂留連竟日即

席賦呈

清商節初變繁蒸夜已遷風物信明遠幽籟生嘉
園夫子設良會汎愛廣招延鳴鳥引深逕石梁俯
清漣崇臺軒以豁四睇開幽鮮西山當戶牖爽氣
散林烟修幹施蔦蘿垂垂懸青天久坐不知蔭蕭
穆依華筵猗與聖明世補袞多餘閑綠野亦已啟
廟廊娛林泉君臣歌一德黎庶倚萬年鼎鼐方調

和吐握猶周旋駑駘未忍置乃曰騏驥焉昂首欲
千里道路苦迤邐颶風驚瓊崖鵬鳥滯湘川平生
感知已白首寧棄捐硜硜守其拙朝宗翰微涓

新秋嚴顥亭招同孫作庭陳學山項去浮秦

補念諸同年讌集

柏府秋開暑氣清西園過雨集群英金貂座滿參
微吏玉醴杯深感舊盟老去久虛燕市夢歡來竟
罷楚江情涼天白露溥溥下長話渾忘曉漏聲

感舊寄姜仲吉介眉兄弟

蕪城百折到沙溝，亂後驚魂得所投。
入戶父兄憐尚在，外家骨肉喜全留。
高情遠勝平原酒，深地藏少伯舟長。
使王孫懷舊德，千金亭畔水悠悠。
往遊西山道中作
僕僕長安道，西山未一遊。
烟霞原素癖，風露况深秋。
出郭沙塵少，穿林圃墅幽。
支筇饒勝槩，隨地足淹留。

香山寺

路轉香山入峯陰，半夕陽烟嵐藏寺僻。
麋鹿與人

忘枕石松濤細，侵衣澗氣涼。
窮探猶未已，鐘磬響雲堂。

自香山寓目永感表忠善應承恩諸寺作

寺借山成勝，山因寺失名。
蒼涼原有色，金碧祇無情。
斷石留華表，踈烟冷化城。
麒麟空廢塚，卧聽白楊聲。

法海寺

峭壁松杉俯排青，疊寺門筇支飛鳥。
上磴轉濕雲，根幽籟笙簧細。
深流虎豹蹲，山僧愛遊客出茗話。

高軒

中秋後一日喜鄉人偶集寓齋

京華昨夜度中秋，猶喜清輝戀客樓。
白露不寒天更遠，碧雲如洗籟全收。
最難令節成良聚，况在他鄉得勝遊。
爛醉出門還握手，一聲新雁動人愁。

懷舍弟季貞

常年秋獲到南臯，穰稔如雲入望遙。
最是白田多紫蟹，此時新釀與誰消。

重陽前一日集杜湘草寓有懷故園

西山幾憶杖筇時，又看黃花到竹籬。
小閣愁深風雨近，長天望極雁鴻遲。
鄉心應各懸三徑，旅况還同遣一卮。
君醉不須辭我去，登高明日更追隨。

秋暮李雷中錢席偶得紅亭酒罷唱驪歌句

張虞山杜湘草相率拈和因足成之

紅亭酒罷唱驪歌，滿樹秋風別緒多。
砧杵淒淒連驛路，雁鴻渺渺度關河。
停車且為須臾立，陟岵其如瞻望何。
揮手燕臺向南去，桑乾日暮起寒波。

途次

鬱鬱川原杳茫茫徑道錯忽忽歲云晚踽踽行靡
樂寒吹振林杪嚴霜凝叢薄瀾流濡深軌老馬嘶
黃落登高肆長望天地何寥廓暝烟動三河萬族
各有託中路逢田叟為我述耕鑿胼胝終歲勤相
酬在秋穫編籬補茅屋婦子咸相若守一理自榮
神完氣乃作古人巖穴居豈曰甘寂寞

定州道中

清風明月晚秋涼棉子花飛白似霜入夜砧聲來
遠近驚人不許夢漁陽清風明月兩驛名

客曉

土屋暖堪睡何為促曉征走傭驚客夢嘶馬亂鷄
聲霜樹烟封厚山程月照平侵晨寒氣逼焉得衣
聲去裘輕

和安靖九

客思無聊覓醉鄉一簾明月映匡床素心共對黃
花晚逸興甘同白石藏不記行吟幾經歲何堪搔
髮漸成霜歸來蚤著閒居賦媿我衣塵惹洛陽

同安靖九遊甘泉庵

叢樹帶晴烟停驂禮梵天荒城餘覺地老衲說甘
泉杯渡洪波後花飛古佛前塵心慚未冷長路又
窮年

小灘謠二首

衛河東下漾金沙密密帆檣兩岸遮南到紅柑北
到棗小旗爭擁獻糧衙

旗軍終歲不曾閒冬兌春開夏始還席未暖時秋
點運駕船依舊赴張灣

雪夜望黎陽

極馬嘶寒急邊鴻帶雪飛弟兄前路見從弟慎庵
佐是邑
鄉國幾時歸歲晚形容失村荒客舍稀濁醪且凭
醉長夜夢依依

至濬縣從弟慎菴署中二首

紆道過相問家園絮語頻八年如旦夕一見轉悲
辛草冷西堂夢時有西周
弟之變霜愁白髮新惟將迎養
意懇懇託歸人

盤桓留幾日詩酒共遠巡門靜羅無雀官閣案有
塵壯年能守拙薄俸肯傷貧祖德傳清白家聲在

爾身

別同年安靖九劉夢闡南歸忽盜警復留一

日

到日黃花開正肥載途雨雪又霏霏樽前聚散情
難遣鏡裏勳名看已違忽漫嚴城驚寇盜更教寒
火傍簾幃語君惟是西湖約莫負春風燕子飛

鉢池山用劉良繡韵

勝地尋仙跡徘徊夕照殘鶴聲何處下洞府幾時
寒河決迷丹竈臺傾落碧灘共憐山氣盡猶作十

洲看

韓醉白邀泛紅橋因憶舊遊諸子

採蓮竟日共追歡玉管金簫浮畫闌三徑恰纔歸

遠客

醉白方歸
自吳門

五湖漸已謝微官舊時雲集傾懷

甚老後風流見面難樽酒愛君還對把肯將此會
等閒看

過劉昭華綠筠草堂

聞君卜築近墻東遍種琅玕一畝宮六月庭階無
暑氣四時門巷有清風杜陵憩息平生是袁尹行

歌率爾同我愛此君長欲對不妨索醉主人翁
秋日陸咸一招泛郭家池

蕭然簾閣俯池幽招客偏宜坐素秋蔬圃霜殘留
戲蝶芰塘風急起眠鷗魚罾斜傍踈籬挂酒舫輕
隨落葉浮蕩漾不知城日隱梵林暮鼓出中洲

重九前四日同舍弟季貞攜酒過劉昭華綠

筠草堂集超宗兼菴西樵姬望嵩三限筠
字時兼菴先去

有客逃禪去林棲是七人雨還近佳節霜豈變叢

筠自擘雙螯健群依一甕親登高更何處踈散百
年身

人日集止園懷陳堦六隴右程濰東平谷

年年此日愛高晴良會同歡老弟兄故土登臨還
作賦殊方吟望未休兵折梅欲寄懷西隴落雁難
歸憶北平憔悴于今行澤畔何時共卧楚州城

病中問舍弟西軒梅花

枕上春光半已過驚心風雨夜來多遙知綠萼乘
春早爭得花前一醉歌

南齋詩集
立秋日南齋植桂

共指飄桐葉吾閒種桂花香於雲外遠秋是小山
嘉盡歲留青駐虛庭引綠賒從茲與松菊三徑滿
烟霞

豐臺絕句三首

雨餘堪並轡風起不揚塵一出春明外花光已動
人

夾道垂楊柳陰陰黃鳥啼石橋流水細知是傍花
蹊

不厭看花早含芳半未開晚風吹爛熳騎馬復誰
來

贈李金門

時同令弟公凱之蓋平

行行出城闈俯仰何凄然鶴鷓鳴在野鴻雁飛在
天飛鳴不相離誰肯中路捐伊人秉素操下帷絕
窺園忽焉仗劍行千里趨塞垣豈不憚艱險至性
重弟昆只彼道旁人感激愴心魂

懷陳階六南歸

聞君百折得歸來酒興詩情老未灰車馬一稀殘

南齊詩集
夢覺兵戈歷盡好懷開烟波韓信臺應在風雨收
臯宅莫摧仰面紅塵驚十丈故園何日共徘徊

高堰歎

擾擾滇南振金鼓聲聞巴蜀連秦楚長淮我任信
樂郊詎知昏墊逾今古禹績猶記九河疏無復宣
房導北渠地中不治治地上黃金捲埽空欹欵星
宿西源東瀉海桐柏下與洪澤會清口湧出勢相
當被此清濁劃有界征戰曾經幾十霜水門啟閉
竟無常天妃牖口日滾滾清水不敵渾水狂西風

排激穿石走夏五彌月淫霖久二瀆交衝堰不支
齒牙橫決七十口浩浩懷襄天地漲魚腥蜃幻迎
四望日射龜鼉窟宅迷霧合鯨鯢波濤蕩七邑可
憐何處村號呼轉徙慘朝昏屋上有舡不得繫城
頭無屋那能存人生最苦遭亂世遙見烽烟猶可
避河伯突怒捲翻來須臾沉溺無噍類特恩何幸
邀皇穹百萬不惜沙泥中坐使子遺快安瀾豈獨
轉輸天庾漕艘通

送許竹隱之山陰

南齋詩集
攜手雙松下高談縱四年纔依燕市酒又上鑑湖
船禹穴書猶在姚江夢自懸樓臺十萬戶日夜待
鳴絃

喜周子戴張岵思入都

金風瑟瑟露溥溥天外寧期故舊歡訪我涼宵還
並轡多君壯志欲彈冠鄉心話入田廬苦秋色嗟
深鼓角殘鄰寺桂花香正發淹留且作小山觀

喜方邵村入京用梁恒山大司農韻

我正愁蕭瑟喜君北道來風塵一對鏡朋好幾銜

盃蘭為當門刈桃誰舊觀栽衰榮休更語陽鳥屬
秋迴

秋日王慕齋大司馬招同白仲調王印周集

怡園二首

秋光新霽後清讌敞林園雲氣涼生壁松花綠到
門徑深幽蘚厚人靜晚禽喧共坐恣醇飲天香散
紫垣

移席重清眺徘徊四望秋西山遙入座北闕正當
樓月皎人烟定砧高夜氣浮元言聽不倦河漢亦

停流

九月三日王阮亭夜集方邵村宋牧仲清言

雅致不似身在長安分贈三絕句

高會平山十五年

予辛丑別阮亭於揚州

燕雲楚水各風烟

兩家兄弟

阮亭兄西樵子側與予及弟季貞彼此皆至交

還相憶霜後持

螯晚菊天

贈阮亭

紫塞風烟入錦囊歸來未減舊時狂勞人最是聲

名重白露烏絲日滿床

贈邵村

赤壁磯頭二月春連檣風雨下淮濱至今把臂思

酬唱一路山光送兩人

贈牧仲

南歸道中次吳崧三韻

浮沉天地一輕舟春北冬南漫浪遊世味老饕真
嚼蠟宦途兒戲等藏鉤樵漁夢入雲烟冷車馬塵
侵木石愁滿眼冰霜驚歲晚不知何處是三洲

三月晦日用賈島起句

三月正當三十日春來春去任流鶯侵晨載酒花
前坐薄暮聞簫樹底行百歲繁華渾過眼一宵風
雨自關情只今片刻如流水猶向河干事送迎

觀徐山琢家樂

淮南叢桂即東山奕罷陶情絲竹間自昔英雄能
勇退慣將歌舞樂餘閑

酬山曉誓禪師

淮陰久不至松石指西軒宦跡空相念禪心無可
言秋風吹老樹孤鶴下寒村省我世間意微吟坐
竹根

九日懷舍弟季貞二首

去年今日我燕臺今日燕臺爾未迴共道黃金還

市駿秋風碣石館重開

登高長望獨徘徊直北翩翩雁影來遙想帝城秋
色好金錢花爛滿豐臺

贈閻再彭二首

登高昨過醉重陽今日還留君子堂我愛幽情懷
獨往一杯常對菊花黃

縞紵同心三十年迴思少壯總茫然只今松柏經
霜茂蒲柳秋風劇可憐

瞻岱

鴻濛一氣接天庭仰視何能辨杳冥海曙忽分群
岫赤雲寒不藉亂松青五千仞竦懷高眺十八盤
迴憶舊經始惜當年渾草草振衣猶未識秦銘

張夏道中

迴合山迎面幽光愜素心沙明湖水闊樹疊暮雲
深獨立秋無際清風吹我襟徂徠思六逸緩步一
追尋

宮詞

萬戶豔陽駐六宮嬌鳥飛玉階承御輦青草亦光

輝

酬林方菴

曉風追憶宴花樓濁酒清歌動客愁齊魯青遙迎
去馬幽燕黃滿黯征裘百年身自悲多病千里人
誰惜遠遊從此看君名日起白頭郎署肯淹留

燕邸守歲

兒女遙相憶翻憐童僕親寒燈青入夜歲酒綠依
人香放梅花細聲傳爆竹新須臾臘應盡太皞會
司晨

閏三月三日集諸僚友奉和白仲調

莫道春歸始惜春春光今戀白頭人黃鶯欲老庭
前樹紅藥行翻輦下塵我認惠風如上巳天增淑
景且三旬壺觴何必河南尹却愛香山見後身

九日樂此園登高和張毅文

梁王雪苑接蓬萊枚馬風流競舉杯委折水橋穿
樹仄陰森石洞倚雲開壺天共信神仙宅詞賦還
追文雅臺最好晴空當令節不教風雨送愁來

訪汪鈍翁竹林寺中

十載投簪去聲名在上都市朝增大隱丘壑少鴻
儒道古衣冠偉神清骨相矍竹林今日裏談笑坐
冰壺

送宋牧仲比部之贛州權關四首

風流為政每多閒聲在臨臯寒碧間我昔左遷江
夏口三年相對水潺潺
扁舟容與泛江春楚水吳山遞送人兩岸題名應
共在妬君重擅墨痕新
惶恐人愁十八灘幽情只作西圖看往來舊惜輕

移棹江雨濺濺入夢寒
風烟南望未全消谿谷斜盤嶺路遙當日曲江開
鳥道不徒輸貢入天朝

同舍弟季貞子迴姪過邁京邸守歲有懷家

大人適手書至併憶六弟止所暨兩幼弟

骨肉天涯聚首難過庭白髮那承歡音書千里聞

強飯鄉井三冬喜輟寒遮草椒花解群穉更堪薪

水惜微官亦知今夕是何夕愛日當同守歲看

趙母貞節詩

母苦節三十餘年教子元深成進士堂有雙燕一傷於鷲鳥其

一逢春至輒孤栖舊巢人以為貞節所感云

秦岱挺寒松嚴氣凜霜雪百尺森龍鱗蚪柯勁如

鐵趙母誓靡他與松競貞節九熊課孤兒各成號

人傑堂有獨燕栖相對時嗚咽歲至以為常依依

不忍別大義感微禽心映冰壺澈彤管紀千秋高

名永截巢

初夏同人過王慕齋大司馬別墅看芍藥二

首

不憚看花遠連鑣出鳳城野明空翠合地僻軟紅

南齋詩集
輕日影翻階動風香繞席生未曾逢爛熳蜂蝶早
營營

綠埜開初夏遊人好駐驂春光留薊北風信似江
南色艷晴霞散香濃曉露含低徊情未已攜酒約
重探

午日雨中招諸子集白雲草堂送孫豹人鄧
孝威兩舍人還山同用李岷瞻韻二首

僻巷深堂與世遺白頭老友共心期松醪綠待佳
時熟榴火紅翻細雨遲別思漫賡三疊唱才名已

達九重知君恩尚許蒲輪返野鶴高空任所之
因君南去動歸情郎署棲遲白髮生親老謾言求
祿仕官閒久覺負科名杜門早定千秋業負郭猶
餘百畝耕記取明年尋此日菑蒲泛酒竹西傾

再送孫豹人

先生高蹈本無求蜃市終難下海鷗名注自天恩
浩蕩身懸幾日夢沉浮菊松遙識存三逕書畫猶
看載一舟我獨何心作小草不知鬢髮已臨秋

送蔣彙征守河南

熊軾初臨竹馬迎，山川形勝古東京。峯連二室雲
爭出，濤湧三河雪自生。麥穗棠花知政異，褰帷露
冕見恩榮。龔黃治績他年最，千尺高梧待鳳鳴。

秋日感懷寄翁東山

爽氣凝清秋，端居望寥廓。桐葉下井幹，仰視飛雲
薄。風物俱蕭森，庭堦任羅雀。名雖側京華，實匪異
丘壑。忽接故鄉書，低田遭魃虐。千里禾苗枯，飛蝗
橫繹絡。開函未終讀，悲哉此民瘼。寒家食指繁，何
以謀藜藿。叩門拙言詞，三復淵明作。念我素心人

遠隔鎬與洛，夙昔有高懷。昕夕將焉託，常欲歸故
廬。一編挂牛角，適意安可期。遙羨空天鶴

七夕前一日陸冰修徐無動先後過白雲草

堂同陳冰壑舍弟季貞縱談竟夜

雨後新秋愛早涼，高軒閒過白雲堂。素心兄弟邀
難集，皓首關河喜共強。踈樹風穿襟帶爽，遠山晴
送薜蘿香。開樽不為陳瓜果，無意相逢話倍長。

送李天生辭官歸養二首

徵君至性戀萊衣，強逼征車意已違。燕市夢迴黃

髮遠秦山望斷白雲飛盛名豈藉西清選殊遇容
辭北闕歸揮手承明就鄉路秋風河上正魚肥

每夜禪房哭嚮晨

天生寓慈仁寺每明發思
母輒號泣不已寺僧皆驚

聲聞

倍覺動丹宸乘時共幸逢明主愛日終難別老親

濟濟都門開祖帳蕭蕭關樹返征輪拊膺何獨非

人子猶憾烏私未得陳

秋日閒居和喬石林三首

天地容吾寄鷦巢亦可居三椽風雨蔽一逕薜蘿

踈迂拙縻官俸逍遙讀道書食餘過後圃霜蔓已

驚除

不自營丘壑依然顏闔家座迎當戶岫隣出隔墻

花看竹車誰入揮絃鳥自斜寸心無所羨痼疾祇

烟霞

屋破通青靄看雲忘日晡樹凋存地骨霜冷淨山

膚遠望愁傷目行吟惜斷鬚天真渾爛熳禮法豈

吾拘

已未除夕同舍弟季貞守歲二首

京華成九至歲序復三除侍養心徒切歸耕願尚

虛浮沉依世路寂寞夢吾廬春讓江南早梅花小
苑舒
去歲逢今夕辛盤映燭輝老妻憂獨返穉子望多
違都市椒漿貴京塵棣萼依趨朝還並轡北闕漏
聲稀

送丁雁水分巡南贛

章貢灘高勢建瓴才人擁節萬山青八叉賦就懸
文筆十樣箋揮勒錦屏陰滿棠花通路接歌留瓠
子直沽聽悠悠旌旆從茲去竚見虔南靖不庭

中秋坐月三首

秋月照長安三年苦獨看光仍天上滿團豈眼中
難頭白疑霜早身孤信夜寒鄉心隨皓魄侵曉不
曾殘

此夜原佳節羈人感倍生管絃誰度曲砧杵亦飛
聲河漢看還近江淮望未明老親與穉子心總在
神京

浮雲遮忽盡驟雨豁青天夢若思鄉醒光還對客
圓風塵吾老矣明晦一悠然終此高情愛今宵不

更眠

期李甥公凱遊黑龍潭

偶愛秋光好城南獨往還潭荒連遠樹閣迴辨層
山歸步斜陽後餘情杳靄間明朝重挈榼與爾共
乘閒

喜逢吳璚符

昨讀驚人句因知塞上還未曾謀載酒相遇即看
山抗志風塵外交情伯仲間璚符余及門天朗弟高唵如未
倦草閣有餘閒

重九前一日張蔚宗大令招集豐臺看菊

帝城冠劍久淄塵出郭尋秋眼一新况有名花迎
令節更從勝地集嘉賓遊情肯為朝參減宦跡偏
逢故舊親共對寒香須盡醉莫觴何必待來晨

懷人六首

黃山白岳樂如何問字門常載酒過晚歲未容安
首著歸田著述等身多謝二峯夫子

勲業皈依祇樹林猶將文字托禪吟丹霞認作開
山祖誰識西歸未死心釋澹歸

漠漠風沙獨出關
芒鞋萬里不曾閒
歸來倚杖珠江上
默坐拈花自解顏

釋阿字

雲林墨妙輞川詩
小築桃源結構奇
更輯晚唐千百首
可能泉壤慰心期

龔半千處士

石版橋西紅樹樓
經年吟咏幾曾休
不知婚嫁何時了
杖策纔為五嶽遊

張虞山文學

早厭承明謝一官
笑人黑白總漫漫
終朝寂坐楸枰畔
長作樵夫局外觀

孫惟一學士

辛酉人日漫興

今年人日最暄和
獨坐茅堂春意多
北闕晴雲連戶牖
西山朝靄出巖阿
藏書滿架堪娛目
濁酒盈樽自放歌
跡混金門忘仕隱
不知遊戲與蹉跎

白雲草堂偶吟

誰家宅第起崇墉
遮斷芙蓉碧數峯
賴得廣臺延遠眺
閒依老樹拓孤蹤
琴追太古音彌澹
酒入殘更興愈濃
對影自吟成久坐
悠然鄰寺動霜鐘

九日送楊修楚太常假歸二首

屈指京華二十年
宦成歸去獨飄然
東籬恰值秋

光好細酌黃花白蝶邊
霜滿燕山落葉飛淮南
稻熟蟹應肥如何日夜思
歸客只向都門送客歸

慰六弟止所下第南歸

不須悲下第自問寸心知
菊待秋方粲松經雪肯
衰故園應早返外戶莫輕窺
歷盡青燈苦看花定
有期

與周紫海二首

昔我入長安眼光黑如漆
驅車日往還囂埃寡所

識側聞紫海翁淵抱固難測
勞勞半歲餘一覲精神
出把臂共飲酒意致殊簡
默微酣始接言瀾翻
海水立天人理至微快論
毫芒析翁真三島人游
戲來塵域

別我忽入秦曰往遊太華
執手不能留縱酒追遙
夜關中百二險西嶽高
無借亦有賈勇上俯視
心神吃何如斲卧人鑿
室蓮花下更聞有老母
陰符奪造化驪山在咫尺
麥飯留茅舍翁倘與之遊
四時觀代謝晉魏自弗知
逍遙歌虞夏

答舍弟季貞除夕見懷

汝亦常天末深諳遠客情
千愁歸五字兩地並三更
元會隨趨謁春田擬退耕
新年頻攬鏡幾日鬢霜盈

送劉水心南歸

偶然隨牒到南宮又理歸帆趁曉風
殘檝未應留伏驥離亭忽漫送飛鴻
酒須更盡無如別詩自能工
况復窮前路山光接齊趙往還都入錦囊中

答張又南大廷尉二首

夢想秦關華岳遙未能拄杖到層霄
何期間氣鍾人傑得傍餘光託聖朝
遠靖邊烽傳世將近持廷論領同寮
自公無事花間集錦宴時時感見招
迂腐乾坤實寡儔孤踪中外任沉浮
時平何用希明哲親老猶慚昧去留
豈愛狂生勞結襪漫承佳句慰登樓
清風把頌盈懷袖欲探驪珠已讓劉

晚泊戴家閘望鄭珠江屈鷺潭舟不至

風雨長途愜素心每於舟泊輒相尋
篷開早接南溟侶觴勸頻賡北道吟
殘樹月斜烏繞遍寒河霜

急雁飛沉停撓野岸空惆悵極目蒼涼何處砧
與劉水心西軒夜坐

偶共西軒坐天高月正明空階寒露重叢樹暝烟
輕夜靜孤襟遠人閑衆籟清論心竟忘寐河漢影
斜橫

同劉水心送柯村弟之揚州限拈字

祇為謀生拙何辭索米嫌言詞終自媿行李莫徒
淹水落堅冰早風高暮雪添留連真欲別韻險愛

同拈

初夏李房六黃羲文見過留同劉水心小酌

率拈少陵句

畏人成小築久矣世情疎老友一開徑清樽與摘
蔬天乾涼雨沐樹密遠風梳長話襟期爽佳辰幸
未虛

贈湯潛庵閣學巡撫江南四首

霜清憲府建牙新坐鎮還資啟沃臣特自青霄來
節鉞暫從黃閣借經綸金鞵寵賜天閑選玉饌榮
分尚食珍
公出特賜
宴賜鞍馬倚毗不輕予賚厚帝心深注

只斯民

國賦東南苦積逋緩征早請陞辭初鴻飛未已須

安集耐困何堪更竭漁一路主恩邀浩蕩十年民

力樂寬舒敷天徧頌時巡詔

詔蘓松積欠一概停徵限十年帶完從公

請也讓善歸君不自居

蚤歲三長冠衆英頻煩分省去西清袖簪豈忍忘

明聖側席還思用老成

公由史官外轉兩任監司林居二十年已未薦舉復

入館閣晉今職

出處關時身最重文章報國事猶輕只今

霖雨蒼生易始慰東山仰望情

使相聲名北斗懸清風裘帶故脩然江山霽映朱

旗展梅柳春迎画戟妍地盡海邦歸節制神由崧

嶽倚蕃宣九重從此紆南顧膏雨親承楚澤先

送童求上人還閩時任湖心寺

禪栖本無著天壤等湖心一鉢寧常住孤舟何遠

尋閒雲橫嶺待老樹隱鐘深迴望淮南月清光徧

舊林

徐山琢少司馬招同劉水心吳姬望杜湘草

集華平園限磯字

時湘草客遊初歸

雨餘林木湛清輝門巷苔深剝啄稀遠別故人還
入座縱談遺事盡忘機風荷遠席香分茗雲樹侵
樓翠濕衣瀟洒不知城市近却容鷗鷺占漁磯

偶成

親老仍加飯兒嬌却嗜書只茲足朝夕樂事出吾
廬

康熙丙子仲春男迴謹于桐園較錄

終

南齋誌傳附錄

大理左寺副丘公墓誌銘

王士禛

公丘氏諱象升字曙戒世為山陽人曾王父嵩縣
諸生王父廩誥贈朝議大夫父俊孫明崇禎癸未
進士歷仕至山西布政使司分守冀寧道右叅政
母張淑人公叅政公第三子幼而聰警日讀書盈
寸年十五為諸生遭兵亂與家人相失逃歸夜黑
陷河中浮沉數里不死若有神助亂定益發憤讀
書旁及詩歌古文皆有神解與弟象隨齊名號為

二丘順治辛卯廕入太學甲午中順天鄉試明年乙未成進士改內翰林弘文院庶吉士御試屢在高等賜宴賜衣寵賚甚厚丁酉授編修戊戌會試為同考官所得二十有八人率當世名士己亥進侍講駸駸嚮用矣庚子三月以才堪外任調瓊州府通判去禁近就冗散又涉炎海萬里冒風濤不測之險人皆為公惜之而公夸然既之官道出徐聞縣縣防兵以餉久不至大譁城門晝閉公直前諭之曰我瓊州別駕也適自省會來藩司給

餉且至汝曹姑待三日則士飽馬騰孰與逆行干紀相率而受赤族之誅乎吾勉為若留待餉至然後發耳徑叩關入使者署弛裝高卧士卒聞公言遂解甲以聽亡何餉果至官弁兵民泣拜於途曰公活我瓊倖職司撫黎黎酋恃險遠數梗王化公曰是不可以文諭而惠結也密檄民兵簡其精銳自將以出黎出不意皆大驚鳥獸駭散禽斬首亂數人餘悉懾伏瓊賦舊越海解藩庫瓊餉復由藩司撥給往返數千里兵民交病公建議以為留瓊

之賦餉瓊之兵其事便遂著為令至今行之平南
王駐粵藩人橫甚督撫大吏以下亡敢誰何者適
檄公攝廣州海防事金某者尚氏壻也為藩翼摠
兵官慕公名願納交公亦與深相結旬日輒張樂
設飲飲必盡醉極歡久益狎乃乘閒說之曰公為
名藩上佐又貴為王壻奉 天子命久鎮東粵粵
民望公如父母然今粵之姦猾不逞率憑藉藩下
以良民為魚肉而供其刀俎利歸此輩而王及公
等皆負惡名不佞誠為公惜之金愀然變色前請

曰某闇淺慮不及此然且奈何公曰是易耳公誠
聞於王庶渠魁數人誅之解散其黨一洒藩下之
恥粵民德王兼德公事在反手間耳金起謝曰微
公吾不聞此言於是啓王下令凡民間被旗害者
以告竟其獄論死者十人鞭三十六人笞四十三
人還民田廬畜牧無算廣人大悅或詣公謝則曰
此王之德金公之力吾何與焉尋奉裁缺之命旋
里丙午補武昌府通判會有通城民變之事通城
武昌下邑也明末疊罹寇亂令張起者徵舊逋鞭

朴旁午民不堪命於是崇仙修竹梓木三里之民攘臂而起大呼薄城令逃匿巡撫中丞聞變集議於庭僉曰發兵擊之便公獨曰不然通城民困久矣本年條銀南漕二米一時並徵民力已不支況重以積逋乎令奉行無狀敲朴繫累草菅民命愚民無告鋌而走險宥之則皆赤子也宜遣一文吏單騎往諭以朝廷德意不治已往可不崇朝而定何張皇為中丞曰善是無逾君者公受命冒大雪倍道而馳未至三十里乘輿張蓋徐傳呼至城

下諭之曰吾奉中丞命來活汝曹汝知之乎抗賦干紀法無赦但念汝曹迫酷吏情非得已姑貰汝死自今日以前無知觸法皆弗聽治汝曹宜漸被自新以稱中丞矜全至意若怙惡不悛大兵一至無噍類矣通民初猶疑貳公為文誓城隍之神曰惟升小子改倖武昌心勞撫字無補流亡通城三里一時蠢蠢詎蔑王章法嚴令窘蕩蕩中丞宥其既往令得自新披心開朗命升前來以察逆順順則宥之逆勦爾命猶恐民愚畏罪自疑勿畏勿疑

明神鑒之升言既出有如皎日首鼠兩端悔將何及惟爾大神默誘其衷有言不信神戮我躬通民聞之皆流涕詣公稽首曰天幸賜公以活吾儕小人之命公又約條請於上緩其徵輸通民益大喜過望是役也所全活凡數千百人庚戌以內艱歸戊午起補大理寺左寺副吳逆倡亂滇中軍民為所煽惑有逃人伍什等悔悟自歸部議以叛逆論事下三法司公引律逃叛自首及能還歸減罪二等之文爭之力且曰方賊跳梁時良民脅從者衆

若絕其歸命之誠而不開以自新之路彼知歸必死益堅為賊耳是資寇兵非計之得也衆躡公言明日駁正上制曰可因著為例旗人有與父異居而鄰人通其後母者父不能制憤語其子曰兒為我手刃之子受命殺之而自歸有司有司論極刑公持之曰春秋書夫人孫於齊不稱姜氏絕不為親禮也夫絕不為親即凡人耳子思子曰為伋也妻者為白也母不為伋也妻者不為白也母某從父治命刃父讐自拘司敗而以大逆傳重辟其

無乃非春秋之義乎遂以兩議上 詔特原之大
學士高陽李文勤公歎曰朝廷須用經術士於丘
君見之矣壬戌公念叅政公春秋高以病請歸省
侍子舍者五年丙寅叅政公棄養甫終制而公病
遂不起年甫六十有一京師士大夫聞者皆太息
以為未竟其用也公事二親至孝官武昌時以轉
漕入京師便道過里值母淑人病諭以王事不可
久留裴回久之痛哭而去行二十里輒馳歸奉湯
藥復痛哭而去明日行五十里又馳歸奉湯藥如

前至再三乃已與弟翰林檢討象隨尤友愛以文
章道德相師友白首無違言甥王侃早失怙誨之
讀書成立又倡諸弟建宗祠以終叅政公志其睦
於族鄙皆此類也尤敦交誼不以生死易心錢唐
胡介歿有寡女不遠千里歲賙卹之久而不衰既
病猶較刊靳應昇張養重遺集刻成慨然曰吾乃
今可報亡友於地下矣公戊戌所得士如吏部侍
郎王君封滌翰林侍講譚君篆給事中姚君祖頊
王君追騏吏部員外郎崔君爾仰等皆為世聞人

而上蔡張沐以理學起中州號為大儒其他以文章知名如嚴偕肇向大觀史尚轍俞灝輩指不勝屈故世以公為知人所著轂音入燕嶺海白雲草堂諸集多至數十卷卓然成一家之言生以明崇禎己巳七月二十二日丑時卒以康熙己巳十一月初三日未時階承德郎官大理寺左寺副前翰林院侍講娶楊氏封安人安人莊靜自持不苟言笑動中禮法尤勤於率作張淑人極賢之生以明崇禎庚午十一月二十七日子時卒以康熙壬戌

七月十七日申時子七人達過邁遠迥述迪過出為兄後邁嗣為檢討子達遠皆早卒女子六人楊雯李師翔周雲書劉繼祖喬崇烈周允學其壻也孫一人重訥余與公同年論交最久又在詞林於公為後進今卜以康熙庚午九月十五日合葬於石塘之新阡檢討以狀來請銘言念平生不覺出涕銘曰登車不落為著作公才早達乃濩落遠浮南溟化鯨鰐單車談笑安荆鄂久以干將試盤錯入為法官尤諤諤丹筆平反恥畫諾始為龍攄終

屈蠖淮水湯湯氣磅礴天降玉棺非石槨昌厥後
人增式廓

丘南齋先生傳

李澄中

公諱象升字曙戒別號南齋淮安山陽人父俊孫
歷仕山西叅政所至有廉直聲公十五歲為諸生
甲午舉於鄉明年成進士選內翰林弘文院庶吉
士
世祖屢召試賜賚優渥丁酉授編修戊戌會試為
同考官稱得人己亥陞侍講庚子外調瓊州府通

判道出徐聞縣防兵以餉缺大譁城門晝閉公直
前揮之曰我瓊州別駕也昨自省會來藩司給餉
且至奈何不三日待而逆行干紀乎若不信吾勉
為若留乃趨進使者署解裝卧已而餉果至兵民
羅拜泣下瓊州通判職撫黎黎酋數叛梗化公謂
吏民曰黎酋不率此不可以恩結也當斬戎首以
殉然後惠懷之則珠崖無事矣於是簡精銳自將
設三覆待之禽斬其渠黎震懾不敢動往時瓊租
越海輸藩庫瓊餉復由藩司撥給往返數千里兵

民交困公建議以瓊賦餉瓊軍至今便之平南王駐粵東藩人倚勢張甚郡縣吏蓄縮莫誰何會公攝廣州海防事有金某者以王壻為藩翼總兵官願交權公公亦與之深相結旬日輒張樂設飲飲必盡醉以益狎因說之曰公為名藩上將軍又貴為王壻民望公如父母竊見藩下人豪暴為人害皆冒名以魚肉良民利歸若輩而王與公受惡名何不聞於王誅首惡解散其黨收粵人之心德王與將軍乎金感悟俯諾惟謹因啟王下令民間有

被藩下人橫虐者以告竟其獄論死者十人鞭三十六人笞四十三人奪還民田產畜牧無算廣人大悅尋以裁缺歸丙午以原職補武昌值通城民變通城為武昌屬邑自明末數罹寇亂縣令張起督逋賦急酷虐過當崇仙梓木修竹三里之民搗竿大呼薄城令逃匿巡撫聞變集屬吏議僉謂發兵擊之便公曰不然通民苦令久矣本年條銀南漕二米一時並徵已不堪命况重以四年之積逋耶三里又積逋之最多者令無狀繫累敲朴窮民

往往斃杖下疾首無告鋌而走險豈其情哉今遣一文吏開示誠信許其自新可不崇朝而定也巡撫曰善然誰可使者良久曰無以踰公即遣軍官李其將兵五百人副公往時康熙戊申十一月初八日冒雪兼程未至通城三十里公謂李曰彼見兵來恐愈驚擾君姑止此吾單騎先往諭之乃乘輿張蓋從者十許人既至諭父老曰汝曹抗賦重罪無赦第念汝迫於酷吏姑贖汝死吾來奉中丞公命活汝亟宜洗濯以稱中丞公意其赴南門署

面陳疾苦我以百口保通城無恙如怙惡不悛大兵至無噍類矣民猶豫未決公為文誓城隍神辭意慷慨通民間之皆流涕稽首曰天幸賜公活吾屬因悉陳令苛暴及民艱苦狀公立請巡撫緩其徵民大喜過望乃徐招李將軍解甲入城與之燕於南門公署通城三里之民始定庚戌丁內艱去任戊午補大理寺左寺副時吳三桂倡亂軍民為所煽惑逃人伍什率眾悔悟來歸事下三法司刑部以叛逆論公引律文逃叛自首及能還歸減罪

二等爭之曰方賊跳梁時百姓脅從者不少若絕其歸命之誠祇益堅其為賊耳衆譴公言遂駁正上報可旗人有與父異居而隣人通其後母者父憤不能制語其子曰兒為我殺之其子受命至夜果殺後母及鄰人於室自歸有司有司論極刑法司覈擬如所論公持不可曰春秋書夫人孫於齊不稱姜氏絕不為親禮也夫絕不為親即凡人耳彼承父命亦父讐而以大逆論之無乃非春秋之義乎乃以兩議上 詔特從末減大學士李文勤

公聞而賢之為大理五年引經義平反大獄多此類壬戌念叅政公春秋高以病假歸養侍子舍者五年叅政公卒甫終制病遂不起年六十有一公長身而癯口不言人過至事關利害輒侃侃無所撓平生孝友負至性少與弟象隨以詩文名於時道德相資白首無違言近世所希有也篤友誼不以死生易心錢塘胡介有孀女不遠千里歲周卹之病中猶刻斲應昇張養重遺稿所著有嶺海齋音七入燕白雲草堂諸集行世子三人迴述迪篤

行能文有父風論曰侍講公倅武昌時以轉漕便道過里門值母病徘徊久之母諭以王事不可久留公嘗藥痛哭而去行二十里復返嘗藥畢仍痛哭去明日行五十里又馳歸至遠不及反乃已抑何孝思肫篤也遺令三言曰立品讀書積德非學問有本末者能然歟或以位不配望用未竟其才為恨嗚呼有志無時命也奈何昔人蓋常嘆之矣

丘大理公傳

馮景

公姓丘名象升字曙戒淮安山陽人父俊孫歷仕

叅政廉公有威於諸子中雅愛公而教甚嚴公為人直內方外風度凝遠通經術有應變才天性孝友重然諾其推轂士不遺餘力由公顯名者甚衆舉順治乙未進士入翰林戊戌會試為同考官拔二十八人皆天下知名士己亥進侍講庚子三月以才堪外任出判瓊州道過徐聞縣縣有防兵以缺餉遂呼庚癸為亂城門晝閉公適至城下諭之曰吾昨自省城來見藩司給餉者且至胡不靜待三日乃逆紀弄兵受赤族之誅乎苟不吾信吾暫

留此間餉至乃行趣解甲皆歡呼曰諾已而餉果
至公職在撫黎而黎酋數叛公謂吏民曰此積弱
之漸不可以文諭也我當振旅以出斬其戎首然
後以恩懷之遂簡兵設伏擒斬其倡亂者數人黎
酋懾服初瓊之賦越海解省而兵餉又待省給公
建議即以瓊賦餉瓊兵兩利之道也從之公署廣
防廳事多惠政尚氏藩下人倚勢虐民者寘之法
民賴以安瓊判裁補武昌時有通城民變之事知
縣張起徵康熙四年積欠賦錢嚴刑以逞民不堪

命攘臂揭竿欲得張起而甘心焉巡撫林天擎聞
變集吏議之皆曰發兵擊之便公曰不然通民疊
遭寇亂瘡痍未復疾苦久矣本年正供尚力不支
况重以積欠之敲扑乎今誠遣一文吏往撫之不
治既往變可崇朝而弭天擎曰善即遣公副以千
總李甲率兵百人為衛公冒雪兼程五日而至時
康熙戊申十一月也去通城三十里公謂李甲曰
君其止此民見兵來益驚治絲而焚之惡乎靖乃
乘輿張蓋至城下曉諭通城士民以洗濯自新之

南齊書集 傳 三
意民猶首鼠狐疑公為文誓城隍神而後不貳以
母喪去官戊午補大理寺左寺副公之在大理也
持法平吳三桂反軍民為所煽惑有逃人伍什等
未至賊所悔悟來歸吏議以叛逆論事下三法司
時御史單璧與公同覆審公從容執律而前指逃
叛自首及能還歸減罪二等示璧曰此聖人制律
仁至義盡若絕其歸命之誠而不開自新之路彼
知歸必死益堅為賊耳是資寇兵也方賊跳梁時
良民誑誤脅從者不少可概誅乎璧是公言明日

駁正上 制曰可自是從賊之黨聞風來歸者不
絕旗人有與父異居而鄰人通其後母者其父病
不能制憤曰兒為我手刃之旗人受命夜殺二淫
於牀自歸有司論以大逆法司奏當公爭之曰春
秋書夫人孫於齊不稱姜氏絕不為親禮也夫絕
不為親即凡人耳方諸古義宜以非司寇而擅殺
當之不得以逆論也子思子曰為伋也妻者為白
也母不為伋也妻者不為白也母旗人從父治命
手刃父讐自拘司敗而以大逆論之其無乃非春

秋之義也乎遂以兩議上 詔從末減大學士高陽李蔚聞而賢之曰朝廷須用有經術士諒哉河南讞獄有大盜支家科等五十三人皆律斬者公秉燭閱卷太息曰烏有首犯未獲而餘皆處決者是屬豈無有寃者乎明日昌言於三法司曰支家科一日未獲則諸囚無死法三法司不能難也當是時公聲名藉甚九卿間長安為之語曰丘公在理民無寃死久之公念叅政公年高而妻與長子又相繼亡遂謝病歸承歡色養者五年父以壽終

哀毀骨立友愛諸弟終身無間言與同邑靳應昇張養重友善二人既沒為刻其遺集公所著有嶺海轂音七入燕白雲草堂諸集行於世溫雅和厚如其人云疾革時命其子迥三言曰立品曰讀書曰積德山陽知縣崔靖至榻前公張目曰老父母愛百姓言不及私而卒享年六十有一遺命母作佛事子三迥述迪其同母弟洗馬季貞先生為公行狀最詳

贊曰昔人謂甌有麥飯牀有故絮雖儀秦說之不

能使為盜惟其凍餓無聊日與死迫然後忍以其
身棄之於盜賊仁哉是言士大夫服官執法每奏
當盜賊必根株痛斷無俾更生之路秉是忍心何
渠不若甯成義縱輩哉景嘗聞丘公決楚粵疑獄
及陰訟鉤考得其情老吏皆畏其明察景問之公
弗肯言曰非忠厚事也嗚呼是其仁心為質過張

季矣



